

Inatsisartut ataatsimiittarfissaannik, allaffissornikkut sullissiviit ilanngullugit, nutaamik sananissamik 2013-imi novembarimi tunngaviusumik isummernerup Inatsisartunit ilalernerqarnissaanik Inatsisartut aalajangiiffigisassaattut siunnersuut.
(Suleriaatsimut Ataatsimiititaliaq)

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Jens Immanuelson, Siumut, siulittaasoq
Inatsisartunut ilaasortaq Randi V. Evaldsen, Demokraatit, siulittaasup tullia
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Bendt Kristiansen, Inuit Ataqatigiit
Inatsisartunut ilaasortaq Martha Lund Olsen, Siumut
Inatsisartunut ilaasortaq Ineqi Kielsen, Siumut
Inatsisartunut ilaasortaq Kelly Berthelsen, Inuit Ataqatigiit

21. oktober 2016-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Inatsisartut ataatsimiittarfissaannik, allaffissornikkut sullissiviit ilanngullugit, nutaamik sananissamik 2013-imi novembarimi tunngaviusumik isummernerup Inatsisartunit ilalernerqarnissaa siunnersuuteqartup siunnersuuteqarnermini kissaatigaa. Tunngaviusumik isummernermi pineqarpoq aalajangiiffigisassatut siunnersuut (UKA 2013/20) taamani Inatsisartut Siulittaasoqarfiannit saqqummiunneqartoq.

Aalajangiiffigisassatut siunnersuutip taasissutissartaa ima oqaasertaqarpoq:

”Inatsisartut taakkulu allaffissornikkut immikkoortuisa illussaannik nappaanissamut Siulittaasoqarfiup pilersaarussiaanut Inatsisartut tapersiinissaannut aalajangiiffigisassatut siunnersuut.”

Akuerineqarnissani sioqqullugu immikkoortoq UKA 2013/20 Suleriaatsimut Ataatsimiititaliamut suliarineqartussanngorlugu innersunneqarpoq, taannalu ulloq 22. november 2013-imi isumaliutissiissuteqarpoq. Ataatsimiititaliami amerlanerussuteqartut Siumumeersut, Inuit Ataqatigiinneersut, Atassummeersut aammalu Partii Inuit Suleriaatsimut Ataatsimiititaliap isumaliutissiissutaani oqaaseqaatit ilanngullugit siunnersuut taperserpaat. Ataatsimiititaliami ikinerussuteqartup Demokraatit ilaasortaataata siunnersuut tapersinngilaa itigartinneqarnissaalu inassutigalugu.

UKA 2013/20 pillugu isumaliutissiisummini Suleriaatsimut Ataatsimiititaliap oqaatigaa taamani siunnersuutaasoq tunngaviusumik aalajangiinissatut kiisalu Inatsisartoqarfissamik nutaamik sananissamut pilersaarutip naammassineqarnissaanut siunnersuummilu suliasamat aningaasatigullu killiliussat allaaserineqartut iluanni taamatut sanaartornissamut pisariaqartunik isumaqatigiissuteqarnissamut piginnaatitsissutitut iluseqartoq. Inatsisartoqarfissap nutaap sumi inissisimanissaa, ilusissaa angissusissaalu inaarutaasumik suli aalajangiiffigineqanngillat.

Aalajangiiffigisassatut siunnersuutip matuma akuersissutigineqarneratigut Inatsisartoqarfissamik nutaamik pilersaarusernerup naammassinissaa kisiat pinnagu, aammali suliasamat aningaasatigullu killiliussat siunnersuummi allaaserineqartut iluanni taassuminnga sananissaq pillugu pisariaqartunik isumaqatigiissuteqarnissamut Siulittaasoqarfik piginnaatinneqassaaq.

Naalakkersuisut siulittaasuata akissuteqaataani allasimasutut maanna siunissamilu politikerit pitsaaneruserumik atugassaqartinneqarnissaat kiisalu Inatsisartut allaffinnilu sulisut atugaasa pitsaanerulersinneqarnissaannik taamaalillunilu oqartussaaqatigiinnitta pitsaaneruserumik sinaakkutissaqartinneqarnissaannik kissaateqarneq Inatsisartut ataatsimiittarfissaannik nutaamik sananissamut tunngavilersuutigineqarput.

Aammalu siunnersuuteqartup siunnersuummut tunngavilersuutigaa nutaamik Inatsisartoqarfi-liornissaq pillugu sukumiisunik nalunaaruserioqartareersoq, soorlu aamma suliasaq suli Sanaartugassanut Iluarsagassanullu Aningaasaateqarfimmi inissisimasoq. Sanaartorfissamik aalajangersimasumik suli nassaartoqanngitsoq, sanaartorfiusinnaasumillu nutaamik ujarlerneq ingerlateqqinneqassappat suliasap siunissaa pillugu Inatsisartut erseqqissumik isumaqatigiillunilu aalajangernissaat pisariaqartoq siunnersuuteqartup paasissutissiissutigaa.

2. Siunnersuutip Inatsisartunit siullermeerneqarnera

Siunnersuummut tapersiineri ilaatigut oqaatigineqarpoq illutat atortulersuutillu ullutsinnut naleqquttut Inatsisartoqarfimmut politikerinut, sulisunut, innuttaasunut tikeraanullu atoruminarneruserumut sinaakkutissaqartitsisut pisariaqartinneqartut. Kiisalu nutaamik sanaartornissami pisariaqartinneqartut kissaatillu assinginik eqquutsitsisumik iluarsaaneq imminut akilersinnaanerunersoq naliliiffigineqassasoq kissaatigineqarpoq. Siunnersuummut akerliunermi oqaatigineqarpoq illutamik nutaamik sananissamut piffissanngunngitsoq aammalu inuiaqatigiinni pisariaqartitat allat salliutillugit tulleriarinissaq pisariaqartinneqartoq.

3. Tusarniaanermut akissutit

Taamani siunnersuummut (UKA 2013/20) tunngavissatut atortussat suliarineqartut kiisalu tamatumunnga tunngatillugu pingaartitat pillugit nassuiaat naatsoq Inatsisartuni partiinut tusarniaassutigineqartut Suleriaatsimut Ataatsimiititaliap oqaatigaa. Siumut aammalu Inuit Ataqaatigiit tamarmik akuersaartumik tusarniaanermut akissuteqartut ataatsimiititaliap paasissutissiissutigaa.

4. Ataatsimiititaliap siunnersuummik suliarinninnera

Aningaasaqarnermut Akileraartarnermullu Ataatsimiititaliap maluginiarpaa Suleriaatsimut Ataatsimiititaliap UKA 2013/20-mut isumaliutissiissummini naatsorsuutigilluinnarlugulu qularutiginnimmagu ”Siulittaasoqarfiup piginnaatitsissut tamanna akisussaassuseqartumik atorumaaraa, immikkut ilisarnaatilimmik sanaartornissamik kissaateqarneq tamatumunnga atatillugu aningaasartuutitut naapertuutequllugu”. Suleriaatsimut Ataatsimiititaliap taamani oqaatigaa suliassap aningaasartassai tamarmiusut suli naammattumik allaaserineqarsimanngitsut. Tamatumunnga nangissutitut Suleriaatsimut Ataatsimiititaliap kissaatigaa suliniummut siunnersuut inaarutaasoq ataatsimiititaliamut saqqummiunneqaqqaassasoq sanaartornerup aallartinneqarnissaanik Siulittaasoqarfik inaarutaasumik isumaqaatigiissuteqartinnagu. Tunngavissat pigineqartut tunngavigalugit taama isumaqarneq Aningaasaqarnermut Akileraartarnermullu Ataatsimiititaliamit maannangaaq taparserneqarpoq. Ataatsimiititaliap naliliinera malillugu pissutsit arlallit erseqqinnerusumik misissorneqartariaqarlutillu allaaserineqartariaqarput.

Siuliani oqaatigineqartutut suliassap aningaasartassai tamarmiusut inaarutaasumik suli aalajangersarneqanngillat. Illutassap angissusissaa, kvadratmeterimut sanaartornermi akigititassaq aammalu ilusiligaanissaa sanaartugassatut suliassap tamakkiisumik aningaasartassaasa naatsorsornissaanni pingaarnertut tunngavigineqartussaasorinarput. Tamatuma saniatigut illup ingerlanneqarneranut aserfallatsaalineqarneranullu aningaasartuuteqartoqartariaqassaaq.

Ukioq tamaat attartornermut aningaasartuutissanik naliliinermut atatillugu illu 3.500 kvadratmeterisut angissusilik siunnersuummi aallaavigineqartoq Aningaasaqarnermut Akileraartarnermullu Ataatsimiititaliamit maluginiarneqarpoq. Siunnersuummi november 2013-imeersumi illu 3.000 aamma 5.000 kvadratmeterit akornanni angissusilik aallaavigineqarpoq, tamannalu Aningaasaqarnermut Akileraartarnermullu Ataatsimiititaliap naliliinera malillugu aalajangiiffisassatut siunnersuutip matuma akuerineqarneratigut piginnaatitsissutitut atuu-tiinnassaaq. Tunngaviusumik isigalugu suliassaq suli tassaavoq 100 aamma 190 mio. kr.-it akornanni akeqartumik sanaartornissaaq.

Sanaartornermi atortussat nunatsinneersut atorlugit sanaartornerup ingerlanneqarsinnaanissaa ilanngullugu isumaliutigineqartariaqartoq siunnersuutip Inatsisartut ataatsimiittarfianni oqaluuserineqarnerani kissaatigineqarpoq, taamaaliornikkut assersuutigalugu Siku Blokumik kii-

salu kalaallit ujaraannik atuinissaq immikkut periarfissiissutigineqaqqullugu. Taamaaliornik-kut sanaartornerup nunatsinnit aningaasaqarnikkut annertunerpaamik pissarsissutigineqar-nissaa aqputissiuunneqarsinnaavoq. Taamatut kissaateqarnerup sanaartornermi akigititassa-mut qanoq sunniuteqarnissaata tunngavissat pigineqartut tunngavigalugit naliliiffiginissaanut periarfissaqanngilaq.

Sanaartornerup akia taarsigassarsialluunniit aningaasanut inatsimmi allassimassanngillat, allassimassallutilli ukiumoortumik attartornermut kiisalu illumik ingerlatsinermut aserfallat-saaliinermullu aningaasartuutit. Illumut 3.500 kvadratmeteriusumut ukiumoortumik attartor-nermut aningaasartuutissat 10,5 aamma 12,5 mio. kr.-it akornanniittussatut naatsorsuuti-gineqartut ataatsimiititaliamit maluginiarneqarpoq. Tassa aningaasalersuinermi aningaasartuu-tissat apeqquataatillugit ukiut 30-t ingerlaneranni 315 aamma 375 mio. kr.-it akornanni. Illutamik 3.500 kvadratmeterimik sanaartornermut akigititassaq qanoq annertutigissanersoq siunnersuummi toqqaannartumik allassimannngilaq. Kvadratmeterilli annertussusiat aammalu ukiumut attartorneq imminnut toqqaannartumik ataqatigiippata illumut annerpaamik 5.000 kvadratmeterimut ukiumut attartorneq 15 mio. kr.-it aamma 18 mio. kr.-ingajaat akornanni annertussuseqartussatut naatsorsuutigineqartariaqarpoq.

Iluarsaanermut aammalu Inatsisartoqarfimmik nutaamik sanaartornermut aningaasartuutit akornanni assigiinngissutaasinnaasoq Suleriaatsimut Ataatsimiititaliap UKA 2013/20 pillugu isumaliutissiissummini assersuusiorfigaa. Inatsisartunut maanna atugassiissutigineqartunut naapertuuttumik 2200 kvadratmeterimik sanaartorneq iluarsaanerluunniit aallaavigalugu assersuusiamut tunngatillugu ataatsimiititaliaq naliliivoq illup iluarsaassap aserfallatsaaline-qarnerata akisunerunerata nassatarisaanik iluarsaanani nutaamik sanaartornikkut ukiut arfineq pingasut qaangiutiinnartut sipaaruteqartoqaleriissasoq. Tamatumani tunngavissaatinneqarluni illutat peqqussutigineqartut malillugit ingerlaavartumik aserfallatsaalineqarnissaat. Paasissu-tissat maanna pigineqartut aallaavigalugit tamanna pillugu erseqqinnerusumik isummensor-nissamut siusippallaartoq Aningaasaqarnermut Akileraartarnermullu Ataatsimiititaliaq isuma-qarpoq. Aningaasaqarnermut Akileraartarnermullu Ataatsimiititaliamut apeqquataaneruvoq nutaamik sanaartukkap atuuffiani sipaaruteqartoqarsinnaanersoq.

Siuliani oqaatigineqartut Inatsisartoqarfissamik nutaamik sanaartornissap aningaasanut inat-sit aqputigalugu aningaasalersorneqannginnissaa siunnersuummi matumani anguniarneqar-poq, taamaalillunilu sanaartornermut aningaasaliissutit pillugit aningaasanut inatsimmi nalinginnaasumik aalajangersakkat malinneqassanatik. Taamaalillunilu sanaartorneq IST-mut sunniuteqartussaannngilaq. Siunnersuutilli kingunerissavaa aningaasanik qanoq amerlatiginis-saat suli ilisimaneqanngitsunik taarsigassarsinissaq, taamaalillunilu Namminersorlutik Oqar-tussat ukiumut qanoq annertutiginnissaa suli ilisimaneqanngitsunik ukiuni 30-ni pusu-saaffeqarnermik pituttugaassallutik. Taamatut pisussaaffeqarnek aningaasanut inatsisini ukiu-moortuni IST-mi angusanut soorunami sinniuteqassaaq. Taamatuttaaq taarsigassarsiat anin-

gaasartaat Namminersorlutik Oqartussat tamakkiisumik akiitsuisa naatsorsornerannut ilaassapput, taamaalillunilu taarsigassarsinissat allat sunnerneqassallutik.

Taamaattumillu aningaasaliissuteqarnermi marloqiusamik tunngaveqarnermi peruserineqartussa q pillugu missingersuusiordermut inatsimmi nutaami aalajangersakkat siunnersuutip matuma suliarineqarnerani isiginiarneqassasut Aningaasaqarnermut Akileraartarnermullu Ataatsimiititaliaq isumaqarpoq. Tamatuma kinguneranik apeqqutinik kissaatinillu siuliani nassuiaatigineqartunik paasinarsititsisumik suliassatut pilersaarutip allaaserineqarnissaanut siullermik aningaasaliissuteqartoqassaaq.

Tamatuma kingorna suliassaq piviusunngortinneqassanersoq pillugu Inatsisartut aalajangiinissaanut suliassap allaaserineqarnera tunngavigineqassaaq. Taamatut periuseqarnikkut Inatsisartoqarfissamik nutaamik sananissamik pilersaarutit inaarlugit suliarineqarnissaannik Siulittaasoqarfiup peqquneqarnissaa qulakkeerneqassaaq. Tassunga atatillugu ataatsimiititaliamit maluginiarneqarpoq suliassap pilersaaruserineqarnissaanut aningaasat Sanaartugassanut Iluarsagassanullu Aningaasaateqarfimmeereersut aammalu suliassap annertunerusumik allaaserineqarnissaa siunertaralugu aningaasat taakku Siulittaasoqarfimmit atorneqarnissaat inatsisitigut aporfissaqanngitsutut ataatsimiititaliamit isigineqarpoq.

Taamaalillunilu isumannaagassatigut aningaasaqarnikkullu suliassamut atugassarititaasut nutaamik sanaartornissaq pillugu aalajangiisoqartinnagu paasinarsisinneqarsinnaapput. Paasissutissat taakku tunngavigalugit iluarsaasoqassanersoq nutaamilluunniit sanaartortoqassanersoq aalajangiisoqarsinnaavoq, tassungalu ilanngullugu suliariumannittussarsiuusseriaasissaq aningaasaliinissarlu aalajangerneqarlutik. Sanaartornerup aallartinneqarnissaa pillugu Siulittaasoqarfik inaarutaasumik isumaqatigiissusiortinnagu suliassamut pilersaarutip inaarutaasup saqqummiunneqarnissaa suliaq manna pillugu 2013-imi isumaliutissiissummini Suleriaatsimut Ataatsimiititaliap kissaatigaa. Aningaasaliissuteqarnermi marloqiusamik tunngaveqarnermik periutsip malinneratigut suliassamut pilersaarut inaarutaasoq Suleriaatsimut Ataatsimiititaliaannaanngitsumut aammali Inatsisartunut saqqummiunneqassaaq.

Suliassamut ilanngaattissat ilanngaatigereerlugit ukiumut aningaasartuutissat qanoq amerlatiginissaanut nutaamik sanaartukkap atorneqalernerani maanna illutaasut qanoq pineqarnissaat apeqqutaasoq siunnersuummi allassimavoq. Taamaattumillu ataatsimiititaliaq isumaqarpoq suliassamut pilersaarutip suliarineqarneranut atatillugu iluarsaaneq toqqarneqarpat suliassamut missingiummik aningaasatigut kingunerisassanik takutitsisumik aammalu Inatsisartoqarfimmik nutaamik sananermi pisariaqartitat kissaatillu assinginik naammassinittumik suliaqartoqassasoq. Tamatumunnga ilaatigut tunngaviuvoq aalajangiinissamut tunngavissap suliassap allaaserineqarneranik imaqartup pisariaqartinneqartup maanna pigineqannginnera.

Assersuutigalugu ataatsimiititaliami ikinnerussuteqartut Inuit Ataqatigiit ilaasortaatitai siunnersuut pillugu ima oqaaseqaateqarput:

”Inatsisartut ataatsimiittarfissaanik nutaamik suliassaq aallartisavitsinnangu aalajangernissamut tunngavissat naammanginartumik qulaajarneqarsimannngittutut nalilerpagut, ilaatigut sammisap siullermeerneqarnerani Inuit Ataqatigiit piumasaqaatigut takussutissiarineqarsimannnginnerat maluginiarparput.

Nutaamik ataatsimiittarfiliornissamik aalajangernissaq pitinnagu Inuit Ataqatigiit kissaatigaagut:

- *Inatsisartut ataatsimiittarfianni inatsisartoqarfimmilu maannamut ingerlatsinikkut aningaasartuutit naliginnaasut (almindelig vedligeholdelse) qanoq amerlatigineraq takussutissiorneqassasoq kingumut ukiuni tallimani qiviarluni*
- *Inatsisartut ataatsimiittarfianni inatsisartoqarfimmilu aserfallassimassutikkut, oqoqarneranit PCB-qarneranillu kinguneqartumik aningaasartuutigineqartut annaasaqaatigineqartulluunniit qanoq amerlatigineraq takussutissiorneqassasoq*
- *Maannakkut allaffeqarfinni aserfallassimassutsit, oqoqarneranik PCB-qarneranillu ajornartorsiutit tamakkiisumik iluarsartuussinikkut suliarineqassangaluarpata missingiut takussutissiorneqassasoq”.*

Nunatta karsiata inissisimanera qissimingaarlutigu suliallu peqqissaartumik suliarisariaqarnera nalilerlugu Inuit Ataqatigiit takussutissiorneqartussatut kissaatigisagut Inatsisartut 2017-mi upernaakkut ataatsimiinnissaanut saqqummiunneqassasut suliassarlu kinguartinneqarallassasoq.”

5. Siunnersuutip aningaasaqarnikkut kingunissai

Inatsisartoqarfimmik nutaamik sananissap pilersaarusiorneqarnissaanut 2013-imi 3 mio. kr.-it aningaasaliissutigineqartut siunnersuummut matumunnga akissuteqaammini Nalakkersuisut Siulittaasuata paasissutissiissutigaa. Kiisalu paasissutissiissutigineqarpoq 1,5 mio. kr.-it atorneqarsimannngitsut Sanaartugassanut Iluarsagassanullu Aningaasaateqarfimmi suli uningasuutigineqartut. Taamani Suleriaatsimut Ataatsimiititaliaq malillugu aningaasat taakku misissueqqaarnernut, atuisut kissaataannik pissusilersortarnerinillu nalunaarsuinnermut, isumannaallisaanermut piumasaqaatit aalajangersarneqarnerinut, sanaartornissap allaaserineqarneranut, sanaartortitsisussap pilersaarusiornernut sanaartornissallu qanoq akeqarnissaata missingerneqarnissaata naammassineqarnissaanut atorneqartussatut eqqarsaatigineqarsimapput. Aningaasaqarnermut Akileraartarnermullu Ataatsimiititaliaq tamatumunnga annertunerusumik oqaaseqaatissaqanngilaq.

6. Ataatsimiititaliap inassuteqaatai

Ataatsimiititaliami amerlanerussuteqartut Siumup Inuit Ataqatigiillu ilaasortaatitaat siuliani

allassimasut tunngavigalugit allannguutissatut siunnersuummik imaattumik saqqummius-sipput:

Inatsisartut ataatsimiittarfissaannik, allaffissornikkut sullissiviit ilanngullugit, nutaamik sananissamik suliassap allaaserineqarnissaanik Inatsisartut Siulittaasoqarfiata peqquneqarnissaanik Inatsisartut aalajangiiffigisassaattut siunnersuut. Allaaserineqarnerani Inatsisartoqarfimmik sanaartornermi, ingerlatsiner-mi, aserfallatsaaliinermi aammalu kusanartuliatut ilusilersorneqarnissaani aningaasartuutit ilanngullugit nassuiarneqassapput. Kiisalu maanna Inatsisartoqar-fiusup iluarsaaneqarneranut sanilliullugu aningaasaqarnikkut pitsaaqutit ajoqutillu suliassap allaaserineqarnerani nassuiarneqassallutik.

Ataatsimiititaliami ikinnerussuteqartut Demokraatit ilaasortaataat siunnersuut pillugu ima oqaaseqaateqarumavoq:

”Demokraatit pilersaarut siullermik saqqummiunneqaqqaarmalli akuersaarsimanngi-llat. Ukiullu qaangiuttut ingerlanerini suli takusinnaasimanngilarput inuiaat aningaa-saataat taamatut pingaarnersiorniarneri pitsaanerussasoq.

Inuiaqatigiimmi iluanni allanik pingaarnersiugassaqaarpugut Inatsisartut illorsuas-saaniik pisariaqarnerusut. Taakku minnerpaamik 300 million koruunit angullugit Inatsisartut illorsuassaannut atorneqarniat inuiaqatigiinni meeqqat inersimasuttaarlu inuunerissinissaannut suliniutinut pingaarnersiorneqarlutik atorneqarsinnaagaluar-put.

Aningaasat meeqqat atuarfianni pitsaanerusumik atugassaqaartitsinissamut atorne-qarsinnaagaluarput, meeqqat ilinniartitsisullu atuarnerinut sulinerinullu pitsanngor-saaqataasinnaasut, peqqinnissaqarfimmi utaqqisunut ikilisaanermut atorneqarsin-naapput, meeqqat sumiginnakkat amerlavallaanut atugarissaarnerulersinneqarnis-saannut atorneqarsinnaagaluarput, pisortaqaarfiit illuutaannut pisariaqartinneqaqisu-nut iluarsartuussinernut atorneqarsinnaagaluarput, angallannermut soorlu isorliune-rusunut ajornaallisaanernut allarpassuarnullu aningaasat atorneqarsinnaagaluarput.

Politikki ilaatigut aamma pingaarnersiuinermut tunngaveqarsinnaavoq. Ajoraluartu-mik pigerusutanut tamanut akissaqaartitsineq ajorpugut. Taamaattumik pingaarute-qarpoq eqqarsaatigilluarnissaa, inuiaqatigiit ataatsimoorlutik aningaasaataat qanoq atorneqassanersut. Demokraatit takusinnaavaat amerlanerussuteqartut isumaqatigi-nagit.

Demokraatit pingaartikkaluarpaat aningaasanik pingaarnersiuiineq isumaqatigiiffius-sasoq, inuiaqatigiit amerlanerpaat iluanaarfigisassaannik, kisiannili amerlanerus-

suteqartut ersarilluinnartumik inuiaqatigiit aningaasaataat Nunatta Inatsisartui 31-iusut atugassaat pitsaanerunissaannut pingaarnersiorneratigut siunnersuut akuerineqarnissaa orniginartinneruaat.


Demokraatit isumaqarput tamanna eqqortuunngitsoq, pingaarnersiunerlu amerlane-russuteqartuniit uggornarluinnartoq.”

Tamanna tunngavigalugu **ataatsimiititaliami ikinnerussuteqartut Demokraatit ilaasortaataataa** inassutigaa sunnersuut itigartinneqassasoq.


Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappassaaniigassanngortippaa.




Jens Immanuel, siulittaasoq




Randi V. Evaldsen




Peter Olsen




Bendt B. Kristiansen



Martha Lund Olsen



Ineqi Kielsen



Kelly Berthelsen